

Սվերդլով

Մակերես՝ 28.73կմ²

Բնակչություն՝ 1072

Տնային տնտեսությունների թիվը՝ 271

Գյուղը հիմնվել է 18-րդ դարի առաջին կեսին: Հիմնադիրները եղել են գյուղից 6կմ հյուսիս-արևելք գտնվող Դորբանդ կոչվող բնակավայրի բնակիչները: Գյուղն ավելի հին է, քան ենթադրվում է, ինչի մասին է խոսում գյուղի կենտրոնում տուֆից և բազալտից կերտած V-VII դարերի լավ պահպանված Ս.Գևորգ եկեղեցին: Եկեղեցին հիմնովին վերանորոգվել է XIXդ. և հարավային մուտքի առջև կառուցվել է զանգակատուն: Եկեղեցու նեղ և ձգված դահլիճը չորս զույգ որմնամույթերով և թաղակիր կամարներով բաժանվում է հինգ հատվածի: Կիսաշրջանաձև հատակագծով խորանի երկու կողմերում արքիդներով ուղղանկյուն ավանդատներ են: Դռները երեքն են (հարավից, հյուսիսից և արևմուտքից), որոնք ունեցել են ճակտոնով ու զույգ կիսասյուներով ձևավորված կամարակապ շքամուտքեր: Եկեղեցուց հյուսիս-արևելք թաղածածկ մատուռի (XIIIդ.) ավերակներ են: Պահպանվել է գերեզմանոց խաչքարերով և ձիթհան:

Գյուղը գտնվում է Ուռուտ գետի ափին, շրջկենտրոնից 12կմ հյուսիս-արևելք, ծովի մակերևույթից 1480մ բարձրության վրա: Հեռավորությունը մարզկենտրոնից 48կմ: Գյուղի միջով հոսում է Միսիանա գետը:

Գյուղի ազգաբնակչությունը միատարր է: Գյուղի կլիման ձմեռը խստաշունչ է, ամռանը՝ զով, հաճախակի տեղումներով, նաև կարկուտով:

Հիմնականում զբաղվում են ցորենի, գարու, կարտոֆիլի և բանջարա-բոստանային կուլտուրաների արտադրությամբ: Չբաղվում են նաև անասնապահությամբ:

Գյուղամերձ խոտհարքները և արոտավայրերը գտնվում են ծովի մակերևույթից 1900-2400մ բարձրության սահմաններում, անտառային ենթալպյան և ալպյան գոտիներում՝ մեղմ, միջակ թեք լանջերում, որը բարենպաստ է անասնապահության զարգացման համար:

Գյուղն ունի հիմնական դպրոց, բարվոք վիճակում, ուր սովորում է 149 աշակերտ, գրադարան, որը գտնվում է գյուղապետարանի մի մասում, բուժկետ, չունի մշակույթի տուն:

Համայնքի հիմնախնդիրների մեջ կանգորվում են ջրամատակարարման ցանցի վերանորոգումը, ներհամայնքային ճանապարհների հիմնանորոգումը, համայնքային կենտրոնի կառուցում (մշակույթի տուն, մանկապարտեզ):